

Gerettet?

tu langsam

tod

heds di ned oo

iich kumm dir endageeng

auf halbm weech

za zweid

brenga mers doch

besser niewa

des bissala seel

za zweid

gehd doch alles besser

wies su schee haaßd

gfrogd hobis

hunnadmoll

ob mer des leem ned

za zweid

iewa die rundn

brenga solledn

und sie hod

naa gsoochd

hunnadmoll naa

ned bees ned hard

owa naa blebd naa

konnsdas ooschaua

vo wellerer seidn

daßd willsd

drum tod

tu di ned oo

beiß der die zäh ned raus

iich helf dirs ooreißn

des zwirnsfädla

der himml

schmierd si ei

iewa mir

des wasser

schwärzd meina händ

meina orm meina hoor

iich schau
aaner endn ins auch
wos frogd mi ihr blick
wos i hunnadmoll
gfroochd hob sie
die wu i gmochd hädd:
obs denn ka hoffnung
mehr gibd

es wasser
lefd oo vo mir
siggad aus meiner jubbm
meina husn mein hemm
quoggad in meina schuh
schdierd wie a eiszabfm
noo mei herz

gsichder sen
iewa mein gsichd
owa ihrs is ned dabei
ich schbei nan oo
mein leemsredder
und er
saachdrobfednooß
verschdehd ned
worum